

涵芬樓古今文鈔

呂景端
書藏

新
安
印
書
局
PDC

涵芬樓古今文鈔卷九十四目錄

辭賦類

賦上三

秋蓮賦 宋之問

江上愁心賦 張說

長樂花賦 蘇頌

渾天賦 楊炯

麈尾賦 陳子昂

明堂賦 李白

大獵賦 李白

大鵬賦 李白

惜餘春賦 李白

朝獻太清宮賦 杜甫

朝享太廟賦 杜甫

有事于南郊賦 杜甫

受命寶賦 梁肅

鵬賦 杜甫

裴將軍舞劍賦 喬潭

霜鐘賦 喬潭

濟河焚舟賦 高邁

海潮賦 盧肇

華山賦 楊敬之

荔枝賦 張九齡

白羽扇賦 張九齡

白鵬賦 蕭穎士

愛而不見賦 蕭穎士

伐櫻桃樹賦 蕭穎士

白鸚鵡賦 王維

含元殿賦 李華

阿房宮賦 杜牧

晚晴賦 杜牧

西都賦 李庚

東都賦 李庚

感二鳥賦 韓愈

別知賦 韓愈

玄猿賦 吳筠

由鹿賦 呂 溫

懷忠賦 歐陽詹

解崇賦 柳宗元

大明宮賦 孫 樵

傷往賦 劉禹錫

望賦 劉禹錫

砥石賦 劉禹錫

秋聲賦 劉禹錫

問大鈞賦 劉禹錫

何卜賦 劉禹錫

瑞橘賦 李德裕

敲器賦 李德裕

蝨賦 李商隱

蝸賦 李商隱

後蝨賦 陸龜蒙

蠶賦 陸龜蒙

杞菊賦 陸龜蒙

秋蟲賦 羅隱

牡丹賦 舒元興

霍山賦 皮日休

桃花賦 皮日休

夢渴賦 何諷

涵芬樓古今文鈔卷九十四

侯官吳曾祺纂錄

辭賦類

賦上三

秋蓮賦

并序 宋之間

天授元年。勅學士楊炯與之間分直於洛城。西入閣。每雞鳴後。至羽林仗。閣人奏名。請龜契。伫命拱立于御橋之西。玉池清冷。紅渠菡萏。繆履扃闔。自春徂秋。見其生。視其長。覩其盛。惜其衰。得終天年而無夭折者。良以隔礙仙禁。人莫由窺。向若生於瀟湘洞庭。溱洧淇澳。卽有吳姬越客。鄭女衛童。芳心未成。採擷都盡。今委以白露。順以涼風。榮落有期。私分畢矣。斐然願歌其事。久之乃爲秋蓮賦焉。

若夫西城祕掖。北禁仙流。見白露之先降。悲紅渠之已秋。昔之菡萏齊秀。芳敷競發。君門闕兮九重。兵衛儼兮千列。綠葉青枝。緣溝覆池。映連旗以搖豔。輝長劍兮

陸離。疏濠兮裂穀。交流兮相沃。四繞兮丹禁。三市兮承明。曉而望之。若霓裳宛轉。
朝玉京。夕而察之。若霞標灼爍。散赤城。既如秦女。豔日兮鳳鳴。又似洛妃。拾翠兮
鴻驚。足使瑤草罷色。芳樹無情。複道兮詰曲。離宮兮相屬。飛閣兮周廬。金鋪兮璧
除。君之駕兮旖旎。蓮之葉兮扶疎。萬乘顧兮駐綵騎。六宮喜兮停羅裾。仰仙游而
德澤。縱玄覽而神虛。豈與夫溪澗兮沼沚。自生兮自死。海圻兮江沱。萬里兮煙波。
泛漢女。游湘娥。佩鳴玉。戲清渦。中流欲渡兮木蘭楫。幽泉一曲兮採蓮歌。江南兮
峴北。汀洲兮不極。既有芳兮蓑城。長無依兮水國。豈知移植天泉。香飄列仙。嬌紫
臺之月露。含玉宇之風煙。雜葩兮照燭。衆彩兮相宣。鳥翡翠兮丹青翰。樹珊瑚兮
林碧鮮。夫其生也。春風晝蕩。燦日相煎。天桃盡兮穠李滅。出大堤兮豔欲燃。夫其
謝也。秋灰度管。金氣騰天。宮槐疎兮井桐變。搖寒波兮風颯然。歸根息豔兮八九
月。乘化無窮兮千萬年。越人望兮長已矣。鄭女采兮無由緣。何深蒂之能固。何穠
香之獨全。別有待制楊雄。悲秋宋玉。夏之來兮翫早紅。秋之暮兮悲餘綠。禮盛燕

臺人非楚材。雲霧圖兮蘭爲閣。金銀酒兮蓮作杯。落英兮徘徊。風轉兮衰頽。天黃
扉兮灑錦石。縈白蘋兮覆綠苔。寒暑茫茫兮代謝。故葉新花兮往來。何秋日之可
哀。託芙蓉以爲媒。

江上愁心賦

張說

江上之峻山兮。鬱崎嶇而不極。雲爲峯兮煙爲色。歛變態兮心不識。江上之深林
兮。杳冥蒙而不已。鳥爲花兮猿爲子。紛盪瀆兮言莫擬。夏雲陰兮若山。秋水平兮
若天。冬沙飛兮淅淅。春草靡兮芊芊。感四節之默運。知萬化之潛遷。伴衆鳥兮寒
渚。望孤帆兮日邊。雖欲貫愁腸於巧筆。紡離夢於哀絃。是心也。非模放之所逮。將
有言兮是然。將無言兮是然。

長樂花賦

并序 蘇頌

蜀太守庭際有紫華草。秋中始繁。英露洗。冬早尙直。本霜封。蕪雜大同於衆卉。盛
衰小異於羣物。余訝而未識。吏或告余曰。此長虞所賦蜀長樂花也。故心暗賞焉。

因口授書吏。遂墨而成作。恨不見古人所爲。得髣髴其旨爾。

夫長者。以短長之形度其長。則至美。夫樂者。以哀樂之類同其樂。則至喜。長也樂也。吾安得而閒之。嘉纖植之並用。偉令名兮在茲。徒見其豐族。萃尊。高標璀璨。莖丹外而縞中。葉縹分以紅貫。綴綠穎之重疊。索紫蕤之瀾漫。迫而象之。君子其常。或微或章。聳危冠兮纓若綬。默退靜其何望。遠以意之。佳人欲翔。炫炫煌煌。重羅綺兮撲瑤翠。蹇來思而未嘗。匪以幽兮自直。匪以直兮自藏。匪以晚兮自耀。匪以耀兮自強。文濁露之均灑。庇清舒之泛光。本無嫌於散地。甘有寓於殊方。然則太液初滿。上林新霽。芊茸灼爍。萬品千計。搖瑞色而涵芝。雜奇葩而轉蕙。孰與夫玉堂金闕之徧賞。白日青春之特麗。歲不與兮時向闌。風蕭蕭兮夜漫漫。賓遠鴻於沙塞。叫離鶴於江干。君曾不見三月華矣。盡林閒之槁木。千霜殞矣。亦庭下之枯蘭。懿此常度。淩於早寒。假春期而不彩。雖秋冬而不殘。衝雨霰之飛薄。任雲山之險難。芳弗珍於蠹靡。節恆慕於檀欒。吾則知樹背之奚託。惟傾心之可安。如後凋。

之是貴。罔獨立其誰觀。文學掾起而爲亂曰。白露瀼瀼。何草不黃。紫華的的生。君之堂。彼不伐兮。秋自翳。時或珍兮。君是惠。彤庭赫兮。朱草駢。交屈軼兮。友賓連。伊榛莽兮。荒些。君曷爲而賦旃。

渾天賦

并序 楊炯

顯慶五年。炯時年十一。待制弘文館。上元三年。始以應制舉。補校書郎。朝夕靈臺之下。備見銅渾之象。尋返初服。臥病邱園。二十年而一徙官。斯亦拙之效也。代之言天體者。未知渾蓋孰是。代之言天命者。以爲禍福由人。故作渾天賦以辨之。其辭曰。

客有爲宣夜之學者。喟然而言曰。旁望萬里之橫山。而皆青翠。俯察千仞之深谷。而皆黝黑。蒼蒼在上。非其正色。遠而望之。無所至極。日月載於元氣。所以或中而或戾。星辰浮於太空。所以有行而有息。故知天常安而不動。地極深而不測。可以爲觀象之準繩。可以作談天之楷式。有稱周髀之術者。輟然而笑曰。陽動而陰靜。

天迴而地游。天如倚蓋。地若浮舟。出於卯。入於酉。而生晝夜。交於奎。合於角。而有春秋。天則西北既傾。而三光北轉。地則東南不足。而萬穴東流。比於圓首。前臨胸者。後不能覆背。方於執炬。南稱明者。北可以爲幽。此天與而不取。惡遑遑而更求。太史公有睟其容。乃盱衡而告曰。楚既失之。齊亦未爲得也。言宣夜者。星辰不可以闊狹有常。言蓋天者。漏刻不可以春秋各半。周三徑一。遠近乖於辰極。東井南箕。曲直殊於河漢。明入於地。葛稚川所以有辭。日應於天。桓君山由其發難。假蘇秦之不死。既莫知其爲說。儻隸首之重生。亦不能成其算也。二客嘗亦知渾天之事歟。請爲左右揚摧而陳之。原夫杳杳冥冥。天地之精。混沌沌沌。陰陽之本。何太虛之無礙。俾造化之多端。南溟玉室之宮。爰皇是宅。西極金臺之鎮。上帝攸安。地則方如碁局。天則圓如彈丸。天之運也。一北而物生。一南而物死。地之平也。景短而多暑。景長而多寒。太陰當日之衝也。成其薄蝕。衆星傳月之光也。因其波瀾。乾坤闔闢。天地成矣。動靜有常。陰陽行矣。方以類聚。物以羣分。吉凶生矣。在天成象。

在地成文。變化形矣。剖之以三門。張之以八紀。其周天也。三百六十五度。其去地也。九萬一千餘里。日居而月諸。大行而地止。載之以氣。浮之以水。生之育之。長之畜之。亭之毒之。蓋之覆之。天聰明也。聖人得之。天垂象也。聖人則之。其道也不言而信。其神也不怒而威。驗之以衡軸。考之以樞機。三十五官。有羣生之繫命。一十二次。當下土之封畿。中衡外衡。每不召而自至。黃道赤道。亦殊塗而同歸。表裏見伏。聖人於是乎發揮。分至啓閉。聖人於是乎範圍。可以窮理而盡性。可以極深而研幾。天有北斗。杓攜龍角。魁枕參首。天有北辰。衆星環拱。天帝威神。尊之以耀魄。配之以勾陳。有四輔之上相。有三公之近臣。華蓋巖巖。俯臨於帝座。離宮弈弈。旁絕於天津。列長垣之百堵。啓闔闔之重闔。文昌拜於大將。大理囚於貴人。泰階平而君臣穆。招搖指而天下春。東宮則析木之津。壽星之野。箕爲傲客。房爲駟馬。天王對於攝提。皇極臨於宦者。左角右角。兩曜之所巡行。陰閒陽閒。五星之所次舍。後宮掌於燕息。太子承於冢社。宗人宗正。內外惇敘於邦家。市樓市垣。貨殖畢陳。

於天下。北宮則靈龜潛匿。騰蛇伏藏。瓠瓜宛然而獨處。織女終朝而七襄。登漸臺而顧步。御輦道而佺伴。聞雷霆之隱隱。聽枹鼓之硠硠。南斗主爵祿。東壁主文章。須女主布帛。牽牛主關梁。羽林之軍。所以除暴亂。壘壁之陣。所以備非常。四宮則天潢咸池。五車三柱。奎爲封豕。參爲白虎。胃爲天倉。婁爲衆聚。旄頭之北。宰制其胡虜。天畢之陰。蓄洩其雷雨。大陵積尸之肅殺。參旗九旂之部伍。樵蘇之地。出入於園苑。萬億之資。填積於倉庾。南宮則黃龍賦象。朱鳥成形。五帝之座。三光之庭。傷成於鉞。誅成於鑕。禍成於井。德成於衡。執法者。廷尉之曹。大臣之象。少微者。儲君之位。處士之星。天弧直而狼顧。軍市曉而雞鳴。三川之交。鶉火通其耀。七澤之國。翼軫寓其精。南河北河。象闕於是乎增峻。左轄右轄。邊荒於是乎自甯。乃有金之散氣。水之精液。法渭水之橫橋。像昆池之刻石。歲時占其水旱。滄溟應其朝夕。織女之室。漢家之使可尋。飲牛之津。海上之人易覲。日也者。衆陽之長。人君之尊。天雞曉唱。靈鳥晝陵。扶桑臨於大海。若木照於崑崙。太平太蒙。所以司其出入。南

至北至。所以節其寒溫。龍山銜燭。不能議其光景。夸父棄策。無以方其駿奔。月也者。羣陰之紀。上天之使。異姓之王。后妃之事。方諸對而明水浹。重暈市而邊風駛。纔盈蚌蛤。則虜騎先侵。適鬪麒麟。則暗虎潛值。五星者。木爲重華。火爲熒惑。鎮居戊己。斯爲土德。太白主西。辰星主北。俯察人事。仰觀天則。比參右肩之黃。如奎大星之黑。五材所以致用。七政於焉不忒。同舍而有四方。分天而利中國。赤角犯我城。黃角地之爭。五星同色。天下偃兵。趨前舍爲盈。退後舍爲縮。盈則侯王不甯。縮則軍旅不復。或向而或背。或遲而或速。金火犯之而甚憂。歲鎮居之而有福。觀衆星之部署。厯七曜而驅馳。定天下之文。所以通其變。見天下之蹟。所以象其宜。然後播之以風雨。威之以霜霰。或吐霧而蒸雲。或擊雷而鞭電。一旬而太平感。膚寸而天下徧。白日爲之晝昏。恆星爲之不見。爾乃重明合璧。五緯連珠。青氣夜朗。黃雲晝扶。握天鏡。授河圖。若曰。賜之以福。此明王聖帝之休符。至如怪雲祲氣。冬雷夏雪。日暈長虹。星芒伏蠶。陰有餘而地動。陽不足而天裂。若曰。懼之以災。此昏主

亂君之妖蠱。昔者顓頊之命重黎。司天而司地。陶唐之分仲叔。宅西而宅東。其後
宋有子韋。鄭有神龜。魏有石氏。齊有甘公。唐都之推星。王朔之候氣。周文之視日。
吳範之占風。有以見天地之情狀。識陰陽之變通。詩云。謂天蓋高。語云。惟天爲大。
至高而無上。至大而無外。四時行焉。萬物生焉。羣臣莫尊於上帝。法象莫大於皇
天。靈心不測。神理難詮。日何爲兮右轉。天何爲兮左旋。盤古何神兮立天地。巨靈
何聖兮造山川。螟何細兮。師曠清耳而不聞。離朱拭目而無見。鵬何壯兮。搏扶搖
而翔九萬。運海水而擊三千。龜與蛇兮。異其短長之質。椿與菌兮。殊其大小之年。
鐘何鳴兮。應霜氣。劍何仗兮。動星躔。列子何方兮。御風而有待。師門何術兮。驗火
而登仙。魯陽揮戈兮。轉於西日。陶侃折翼兮。登乎上玄。女何冤兮。化精衛。帝何恥
兮。爲杜鵑。爭疆理者。有零陵之石。聞弦歌者。有蓋山之泉。若怪神之不語。夫何述
於此篇。以天乙之武也。焦土而爛石。以唐堯之德也。襄陵而懷山。以顏回之賢也。
貧居於陋巷。以孔子之聖也。情希乎執鞭。馮唐入於郎署也。兩君而未識。楊雄在

於天祿也。三代而不遷。桓譚思周於圖讖也。忽焉不樂。張衡術窮於天地也。退而歸田。我無爲而人自化。吾不知其所以然而然。

塵尾賦

并序 陳子昂

甲子歲。天子在洛陽。時余始解褐。守祕書省正字。太子司直宗秦客。置酒於金谷亭。大集賓客。酒酣。共賦座上食物。命余爲塵尾賦焉。

天子浩浩兮。物亦云云。性命變化兮。如絲之棼。或以神好正直。天監默默。或以道惡強梁。天亦茫茫。此仙都之靈獸。因何負而罹殃。始居幽山之藪。食乎豐草之鄉。不害物以利己。每營道而同方。何忘情以委代。而任性之不忘。卒罟網以見逼。受庖割而罹傷。豈不以斯尾之有用。而殺身於此堂。爲君雕俎之羞。則君金盤之實。承主人之嘉慶。對象筵與寶瑟。雖信美於茲辰。詎同歡於疇日。客有感之而歎曰。命不可思。神亦難測。吉凶悔吝。未始有極。借如天道之用。莫神於龍。受戮爲醢。不知其凶。王者之瑞。莫聖於麟。遇害於野。不知其仁。神旣不能自智。聖亦不能自知。